


## Të dhëna biografike

### Dave Hunt

Lindur në 1926, Dejvi gëzoi avantazhet e një edukimi të perëndishëm dhe e vuri besimin në Krishtin Jezus si Shpëtimtarin dhe Zotin e tij personal që në vitet e hershme të rinisë së tij. Ai mori një gradë shkencore në matematikë nga U.C.L.A. Martesa me gruan e tij, Ruthin, u pasua me lindjen e katër



fëmijëve, një karriere si CPA/këshillues menaxhimi dhe, më vonë, menaxhimin e disa korporatave radhazi. Njëherazi me aktivitetet që kanë të bëjnë me kishën, Dejvi filloi dhe u përfshi në disa shërbesa për universitarët dhe takime në shtëpinë e tij, dhe me fushatë ungjillëzimi veçanërisht për të rinjtë judenj dhe studentët e huaj.

Që prej vitit 1973 dëshira e Dejvit për shërbesë me kohë të plotë u përmbush nëpërmjet autorësisë së librave që trajtonin inkursionin, në kulturën perëndimore dhe në vetë kishën, e filozofive psikologjike dhe egoiste lindore, inkursionin e ekumenizmit si dhe të mësimëve të tjera jobliblike. Shqetësimi mbi fenë dhe politikat islamike reflektohen në artikujt, fjalimet dhe intervistat e fundit.

Të paktën 4 milion kopje të librave të tij janë shitur dhe janë përkthyer në më shumë se 50 gjuhë. Ato përfshijnë: *Shpërthimi i kulteve, Krijuesit e perëndive, Joshja e krishterimit, Paqja globale dhe ngritja e antikrishtit, Pushtimi i okultit, Një kupë hutimi, Në mbrojtje të besimit, Një thirrje urgjente për një besim serioz, Çfarë dashurie është kjo?, Numërim mbrapsht drejt ardhjes së dytë, Të kërkosh dhe të gjesh Perëndinë, Dyshime të sinqerta, Dita e gjykimit! Islami, Israeli dhe Kombet*, dhe libri i tij më i fundit *Joga dhe Trupi i Krishtit*.

Videoja e tij, *Izraeli, Islami & Armagedoni* është kthyer në një mjet të pamasë për kishat dhe të interesuarit për përhapjen e së vërtetës në lidhje me ngjarjet para, gjatë dhe që kur ka ndodhur sulmi në Qendrën Tregtare Botërore.

Hulumtimet e sakta të Dejvit si dhe dituria e mirënjohur e tij bazohen mbi studimet e thella të bëra të dokumenteve dhe botimeve origjinale, intervistave me ekspertë kryesorë nga vende të ndryshme të botës si dhe udhëtimeve në shumë vende të botës — duke përfshirë Amerikën e Jugut, Australinë, Evropën dhe gjatë Lindjes së Mesme.

Një folës i kërkuar nëpër konferenca, Dejvi është edhe një i ftuar i shpeshtë i emisioneve të ndryshme radiotelevizive. Bashkë me T.A. McMahon, çdo javë Dejvi i nxit dëgjuesit e programit radiofonik *Shqyrtoni Çdo Ditë Shkrimet*, i cili transmetohet në mbi 350 stacione në SH.B.A. dhe në mbarë botën nëpërmjet valëve të shkurtra.